

KARTA KU PAULU SKIRBI PA FILEMON

Introduson

E krenti di Kolosus konvertiba na mon di Paulu (v.19). Un grupu di krenti ta juntaba na si kasa. Si katibu, Onésimu, fusiba, i ciga na Roma, nunde ki oja Paulu, i bai konverti. Paulu skirbi e karta pa pidi Filemon pa i purda rapas, i risibil suma ermon. Nomi di Onésimu signifika util, o “ku bali” (v.11). Afia (v.2) pudiba sedu minjer di Filemon; talves Arkipu seduba se fiju, ma sertamenti i seduba diriženti di igreža (Kol 4.17). Un obreru comadu Tíkiku kumpaňa Onésimu (Kol 4.7-9). Epafras (v.23) i kil ku tarbajaba ciu pa igreža di Kolosus (Kol 1.7-8; 4.12-13). Konformi utru librus, Filemon liberta Onésimu; mas tardi Onésimu bin sedu diriženti di igreža di Bereia.

Kumsada ku manteňa

¹Ami Paulu, prezu pa amor di Kristu Jesus, ku no ermon Timótiu, no skirbi pa no kiridu ermon Filemon, no kumpaňer di tarbaju, ²ku no irma Afia, ku Arkipu no kumpaňer soldadu, ku igreža ku sta na bu kasa. ³N misti pa Deus no Pape ku Siňor Jesus Kristu da bos fabur ku pas.

Amor ku fe di Filemon

⁴Kada bias ku N ora, N ta coma bu nomi, N ta fala ña Deus obrigadu, ⁵pabia N ta obi di bu amor pa tudu pobu di Deus, ku fe ku bu ten na Siňor Jesus. ⁶N ta ora pa bu sedu forti na mostra bu fe, pa jinti pudi ten kada bias mas bon ntindimentu di tudu benson ku no union ku Kristu ta tisinu. ⁷Ña ermon, bu amor tisin garandi alegria ku

konsolason, pabia bu anima korson di pobu di Deus.

Paulu roga pa Onésimu

⁸Asin pa e roson, kontudu N ten diritu di mostrau bu dever, suma ermon na Kristu, ⁹ma N misti pidiu, pabia de amor, mesmu ku N sedu Paulu bejoti, gosi prezu pa amor di Kristu Jesus. ¹⁰N na rogau pa ña fiju Onésimu ku N padi li na kalabus, ¹¹ku ka baliba pa bo, ma gosi i bali pa bo i pa mi. N na mandau el, ¹²ma ña korson na bai ku el. ¹³N mistiba fika ku el pa i sirbin na bu lugar, kontra N sta prezu pabia di Bon Noba, ¹⁴ma N ka misti obligau pa bu judan. N misti pa bu fasil na bu libri vontadi. Asin N ka na fasi nada si bu ka konkorda. ¹⁵I pudi sedu ki separaba di bo pa un tempu, pa bu pudi bin tenel pa tudu tempu. ¹⁶Gosi ja i ka suma katibu, ma mas di ki asin, suma ermon ku bu ama. Ami N amal ciu; ku fadi abo, suma bu algin ma tambi suma

1.1: Ef 3.1 1.2: Kol 4.17 1.2: Rom 16.5 1.3: Rom 1.7
1.4: Rom 1.8 1.5: Ef 1.15 1.6: Fil 1.9-11 1.7: 2 Kor 7.13;
2 Tim 1.16 1.8: 1 Tes 2.6 1.10: 1 Kor 4.15; Kol 4.9
1.13: 1 Kor 16.17; Fil 2.30 1.14: 2 Kor 9.7
1.15: Kum 45.5,8; Rom 8.28 1.16: Mat 23.8; 1 Tim 6.2

ermon na Siñor. ¹⁷Si bu tenen suma kumpañer, risibil suma mi propi. ¹⁸Si i fasiu kualker danu, o i dibiun un kusa, lansal na ña konta. ¹⁹Ali N na skirbi ku ña propi mon: Ami Paulu N na pagau. N ka pirsisa di falau kuma bu dibin bu propi kabesa. ²⁰Asin ermon, fasin e fabur pa amor di Siñor, bu dan animu suma ña ermon na Kristu.

²¹N skirbiu ku fiansa kuma bu na fasi kil ku N pidiau. Bardadi N sibi kuma bu na fasi inda mas. ²²N na

pidiau mas un kusa, pa bu pruntia kuartu pa mi, pabia N spera kuma Deus na ruspundi bo orason, i na mandan pa bos.

Manteña di kabantada

²³Epafras, ku sta ku mi na kalabus pa amor di Kristu Jesus, i mandau manteña, ²⁴suma tambu Markus, Aristarku, Demas ku Lukas, ña kumpañeris na tarbaju.

²⁵Fabur di Siñor Jesus Kristu ta sta ku bo spiritu. Amen.